

KALATE BAA PAUL A NGA TILI TIMÔTEUS

Mebatan

(1 Tim 1 : 1, 2)

1 1 Ma Paul, nlômane Krist Yésus amu nkômbane Zambe, aval ane ntiñetane ya ényíñ é n e be Krist Yésus. 2 M'atili Timôteus, mon m'anye'e. Mvam ; nkoan éngongol a mvo'é bi bo'o e be wo, bi so'o e be Zambe Esaa a e be Krist Yésus Nti wongan.

Nkamane mbamba foé

(M.M. 16 : 1-3 ; Ef 1 : 3-7 ; 2 : 8, 9 ; 2 Tés 2 : 13-15 ; 1 Tim 4 : 14 ; 2 Tim 2 : 1-12 ; 3 : 15)

3 M'ave Zambe akéva, nnye m'asaane nye, e mfubane mone tyiña nleme été, aval ane bemvamba, éyoñ m'asimesane wo mban e meye'elane mam été. 4 Ane m'asimesan mili'i môé, alu ba môs m'adañe kômbô na me yene wo, ane me ne jaé a mevak. 5 M'asimesan mbunane wôé ô ne te meyeñ, ñwô ô nga tate tabe be émvame minga jôé Lois a e be nyua wôé Enis, a éyoñe ji, m'atu'a yeme na ô ne fe e be wo. 6 Amu ajô ete nde m'alebe wo na ô yôñôlô mveane Zambe ô ne e be wo amu mbetane mo mam; 7 amu Zambe a nji ve bia nsisim ya nkoane woñ, ve nsisim ya ngul a nye'an a éjjin. 8 Ajô ete te wô'ô ôson ya kañete Nti wongan nga ma mbô'ô wé, ve ô jobi'i ngabe njuk amu mbamba foé ya ngule Zambe, 9 nnye a nga nyii bia a loene bia e mfufub nloen, sa amu mimboane mingan, ve amu mbôndane fe'e wé émien a mvam é nga veeban e be bia e Krist Yésus biyoñe ya kôa, 10 ve éyoñe ji é manya litiban amu ñyenane Nyii wongan Yésus Krist a nga yené, nnye a nga te'elan awu, a zu ényíñ a ntabane ya te wu e éfufub été amu mbamba foé. 11 Amu mbamba foé ate me nga teleban nkatefoé a nlôman a ñye'ele, 12 amu ajô ete m'awu de mintaé. Ve me nji wô'ô ôson, amu m'ayeme nyô me nga buni, a m'atu'a yeme na a ne ngule ya baala jôm é nga veban e be ma akekui Môs ôte. 13 O Tôñesa'an éyeka'a bezôsô me jô ô nga wô'ô e be ma, e mbunan a e nye'an ô ne e be Krist Yésus; 14 ô baaale benya mejô me nga veban e be wo a Mfufub Nsisim nye a too e be bia.

15 W'ayeme na ba bese be too Asia be lumeya me mvus, mmbe bete Figelos baa Hermôgenas be ne été. 16 Nti a tame ko nda bôt Oniseforus éngôngo, amu biyoñ biyoñ a nga bo na nlem ô vobô ma; a nji wô'ô ngôkobe jam ôson. 17 Ve éyoñ a nga kui e Rôm, a nga ji'a jeñe ma, ane a nga yene fe ma — 18 Nti a bo'o na a yen nkoan éngôngol ô so'o e be Nti môs ôte — a w'atu'a yem ésaé ése a nga bo Efésus.

Mbamba mone bezimba Krist Yésus

(Mat 10 : 32, 33; 1 Kor 9 : 24-27; 2 Tim 3 : 10-12; 4 : 5-8; Nkul 2 : 10)

2 1 Ajô ete, A wo mone wom, bo'o ngul e mvam é ne e be Krist Yésus, 2 nde mam ô nga wô'ô e be ma, e mise bengaa abui, ô va'a me bôt be ne ba ya buni; mmbe b'aye bo ngule ya ye'ele fe ba bevok. 3 o jibi'i ngabe njuk; aval ane mbamba mone bezimba Krist Yésus. 4 Teke'e mô't a ntoo ésaé bezimba Krist Yésus a ne beta timbi a mam me

Rev. Matthias MEYE

Secrétaire Général 1961

nlam, amu a yiane yene mvaé e be mỗt a nga tili nye ésaé bezimbi. 5 Nalé ate fe, mỗt a sỗngane mbil e nseñe bivôé, a vo'ô jalebane ékat, te na a nga sỗngane mbil aval ane metiñe ya été m'ajô. 6 Mbé mefub a ju'u ésaé, nnye ayiane nyoñe ngab ôsu ya bibuma. 7 Simesa'ane jam m'ajô di, amu Nti a ye ve wo fek mfa'a ya mam mese.

8 O simesa'an Yésus Krist, nyô a nga wômô akôlô miñwuan, mỗt ya mvoñe bôt David, aval ane mbamba foé wom a né, 9 mbamba fôé ate m'ajibi nye minjuk a ka'abane mengata'a aval ane nsebe bitom. Ve mejô me Zambe me nji bo nka'an. 10 Ajô ete nde m'ajibi mam mese amu ajô ya ba be ne mintoban, ane fe b'aye yen nyian ô ne e be Krist Yésus fufulu a étôto'o ya nnôm éto.

11 Njôana wuna ô ne wu ya buni na, amu nge bia be nye bi nga wu mfula'ane, bi aye fe nyiñ mfula'ane ;

12 nge bi ajibi, bi aye bi aye fe jôô bia be nye ; nge bi akate nye, nnye fe a ye kate bia ;

13 nge bi nji bo ba ya buni, ve nnye a langan a too nyô ya buni, a mu a se ngul ya kate émien.

Mboésané a kabe

(1Tim 1 : 3-7, 18-20; 6 : 20, 21; Tit 2 : 1, 11-15)

14 O bo'ô na be simesane mam mete, a tu'a keñete be e mise me Nti na, be bo te bo mỗman e mfeta'ane mejô, me nji volô jôm, m'aviane ndumetane bewôk. 15 O bo'ô mbane ya liti womien asu Zambe a ne nyô a ne nkañesan, mboésané, nyô a ne te yiane wô'ô ôson, nyô a ye'ele mejô ya benya mejôô zôsôô. 16 O sa'ale'e bitôto'ô bi nkobô ébiasé, amu bi akee bôt abui e ébiasé Zambe été, 17 a mejô map m'ake m'adi ane fô. Mmbe bete Himénayos baa Filétus be ne été. 18 Bôte bete be nga yale zene fe a li'i benya mejôô, be na, ñwômane miñwuan ô maneya lỗt ayap. Be nga sô'ôlô mbunane bôt bevok e si. 19 Ve ngungule mbôka'a Zambe ô tele, ô be'e mfeta'a wuna na Nti a yeme ba be ne émbé, a na, Nyô ase a tote jôé Nti a sa'ale'e ékotekot. 20 Nde, mfa'a ya beta nda été, mevie'e me nji bo ve ma me gôlt a ma me silba étam, ve ma bilé a ma étek : mevok mfa'a ya mebelan me ne ésemen, a ma mevo'ô mfa'a ya mebelan ya mam me ne ôson. 21 Nge mỗt éziñ a tun émien mfa'a ya mam me ne ôson, a ye bo vie'e ô ne ésemen, ntunan, wu mie ndaa a belane wô ? nkôman ya bo mbamba ésaé ase. 22 Nde, ô mate'e mbia minkômbane ya bisoé, ô tôñesa'an mam me ne zôsô, mbunan, nye'an, a mvo'é, afulane ba b'aloene Nti a nloen w'aso e mfubane nlem. 23 Ve ô bene minsôane bisô mi ne asuk a teke'e fek, amu w'ayeme na mi abiaé meluman. 24 Nde, mboésané Nyi a nji yiane bo mỗta meluman, ve évôvoé e be bôte bese, ntyetyeñ ñye'ele njiban; 25 a lebe bôt b'awosane nye a nlem nje'eбан. Eyoñ éziñ Zambe a ye ve be nekôñelan nlem ane be ne yeme benya mejôô, 26 a ane be ne tub ékoé diable, mvuse ya éyoñ a maneya bi be na, be bo nkômbane wé.

Fulu bôt e melu m'asu'ulan

(Tit 1 : 10-16; 2 Pét 2 : 1-22; Yuda 3)

3 1 Ve tame yeme jame dina na, melu m'asu'ulan, biyoñ bi ne angôndo bi aye bo, 2 amu bôt b'aye bo benye'e bebien, benye'e moné, bewulu ngunguan, mebun, bekobô ébiasé, bebo bebiaé melo, bikalak, mimvimvin, 3 njet, bôte metyama'ane, beso'é bôt betejôô bebien, minlelañ, bevini mvaé, 4 bekoñe bôt, minlem ôjeja'a, bemebunu, benye'e mam mevak, a sa mam me Zambe. 5 Be bili éyeka'a nkoane Zambe woñ, ve be kateya ngul ya été. Sa'ale'e aka'a bôt ete. 6 Amu bevo'ô be ne été mbe b'ake b'anyiin e menda menda, a bi mintete'e mi binga mi ne njalan a mam abé, ntindiban a mbia minkômbane mevale Meva. Mmbe b'anye'e b'avô'ôlô mỗt ase, nde be vo'ô kui ñyemane benya

mejôô. 8 aval ane Yanes a Yambrés be nga wosane Môze, aval ete fe bôte ba b'awosane benya mejôô, bôt minlem mi maneya boé, a be kuya a lí'i mbunan. 9 ve b'aye bo te dañe ke ôyap, amu akute dap d'aye litiban e be bôte bese, aval ane di ya bôte bete bebaé e nga bo.

Nleban w'asu'ulan e be Timôteus

(M.M; 13 : 50; 14 : 1-22; 2 Kor 6 : 3-10; 2 Tim 1 : 13; 2 Pét 1: 19-21)

10 Ve wo ô ngga tôniaesan ñye'elane wom, ntabane wom, ntyi'ane ya nleme wom, mbunane wom, ayabe njibane wom, 11 bikpwe'ele biam, ñwô'ane mintae wom, aka'a mam me nga tôbane de Antiôka, Ikônia a Listra, aval bikpwe'ele me nga jibi; ve mfa'a ya mam mete mese, Nti a nga nyii ma. 12 Yaa, bôte bese b'akômbô tabe ntabane ya ko Zambe woñ, e be Krist b'aye wu ékpwe'ele. 13 Ve mbia be bôt a bedu'u bôt b'aye nenenene abé dap, be du'u, bebien be du'ubane fe. 14 Ve wo, kele'e ôsu e mam ô maneya ye'é, a ma ô maneya tu'a buni, ô yeme ba ô nga ye'é me e be be, 15 a na, aso mongô, ô nga yemban a mintilan mi ne étyi, mmie mi ne ngule ya ye'ele wo ajô nyian amu mbunan ô ne be Krist Yésus. 16 Ntilan ôse ô nga veban a ngule Zambe, w'avolô mfa'a ya ñye'elan, mfa'a ya komekan, mfa'a ya beta telé mô't zôsôô, a mfa'a ya tyeñele mô't e zôsôô été: 17 nde ete mô'ta Zambe a ye bo njalan, nkômesane ngumba mfa'a ya mbamba mboan ase.

4 1 M'alebe wo e mise me Zambe a Krist Yésus, nyô a ye tyi'i beveve'e a miñwuane mejôa ñyenane wé a éjôé jé: 2 kate mejô, ô bo'ô avôl, éyoñ afôla e né, a éyoñ afôla é nji bo, kpwe'é bôt, komeka'an lebek, te kate njiban a ñye'elan. " Amu éyoñ j'aye bo éyoñ bôt b'aye bo te jibi zôsôa ñye'elan, ve aval ane bi bili mintyañ e melo, b'aye kô'ôlane bebien beye'ele aval ese ane minkômbane miap mi né, 4 a b'aye vaa melo ya vô'ôlô benya mejôô, a ke b'andeh a minkana. 5 Ve wo, bo'ô fek mimfa'a mise, jibi'i minjuk, bo'ô ésaé nkate mbamaba foé, jale'e ésaé mvolô jôé.

6 Amu me ntoo bebé ya tyi'iban; éyoñe ya akôlô dam é kuiya. 7 Me maneya luman mbamba meluman mete, me sondôya mmatane mbil ôte, me maneya ba'ale mbunan ôte. 8 Ataté éyoñe ji, ékate zôsôô été é ntoo me nnaan, nje Nti, zôsôa ntyi'i mejô, a ye ve ma mô's ôte ; a sa ve ma étam, ve nalé fe ba bese b'anye'e ñyenane a ye yené.

Miñye'elan ajô Paul émien

9 Bo'ô avôl ya ji'a zu e be ma, 10 amu Démas a nga lí'i ma, a kele'e Tésalônika, amu a nga nye'e si ndône nyô. Kresens a keya e Galatia, Titus a keya e Dalmatia. 11 Ve Lukas étam bia nye bi too. O nyoñe Markus, ô zule nye e nsamba wôé, amu a ne ma mvolan, amu a ne me mfi mfa'a ya bisaé. 12 Ve Tikitus nnye me lômeya Efésus. 13 Alô'ô me nga lí'i e Trôas e be Karpus, ô za'a de éyoñ w'azu ; nalé fe bekalate, adañedañe ba be ne bikôb bi tit. 14 Aleksander, nlui binyune bi mvot, a nga bo me abé abui : Nti a ye ya'ane nye aval ane mimboane mié mi né. 15 Womienne fe, ô tabe'e nye ntye, amu a nga dañe sengane foé jangan. 16 Nkat ya ôsu me nga kat ajô dam, teke'e mô't a nga tebe me ngam ; ve bese be nga lí'i ma. Jam ete e bo'ô te lañebane be ébuk. 17 Ve Nti, a nga too me ngam, a va'a me ngul ya tua kpwamé mejô, ane Bikul bise bi aye wô'ô me. Nalé me nga vas anyu nbweñbwem éte. 18 Nti a ye vaa ma mfa'a ya mbia mboan ase, a ye fe nyii ma akui éjôé jé ya yôb. Duma e bo'ô e be nye nnôm éto a nnôm éto. Amen.

Mebatan m'asu'ulan

(Rôm 16 : 3, 4; 2 Tim 1 : 16-18)

19 Sili'i ma Priska baa Akulas, a bôt ya nda Onesiforus. 20 Erastus a nga li'i a too e Korent ; ve me nga li'i Trôfimus a yake'e e Milétus. 21 O bo'o na ô ji'a zu éyoñ ôyôn ô za bo'ok. Ebulus a sili'i wo, ba Pudens, a Linus, a Klaudia, a bobējañe bese. 22 Nti a tabe'e e be nsisime wôé. Mvam é bo'o e be mia.



Rev. Matthias MEYE
Secrétaire Général 1961.....